

每週經課朗誦經文(巴克禮台語漢字)2012/12/02

共同經課 - 1

耶利米書三十三章十四節~十六節

14 耶和華講：「看啊，日子欲到，我應允以色列家及猶大家的好話我欲互伊成。15 當彼日，彼時，我欲給大衛發生義的枝；伊欲佇地上行公平及公義。16 佇彼日猶大欲得著救，耶路撒冷欲安然倚起，伊的名欲稱做『耶和華——咱的義』」

共同經課 - 2

詩篇二十五篇一節~十節

1 〔大衛的詩〕耶和華啊，我的心神仰望你。2 我的上帝啊，我平素倚靠你；毋通互我見誚，毋通互我的對敵因為贏我來誇口。3 見若聽候你者的確無見誚；許個無緣故行奸詐者欲見誚。4 耶和華啊，求你將你的道路指示我，將你的路途教示我！5 求你導我佇你的真理，閣教示我，因為你是救我的上帝。我通日聽候你。6 耶和華啊，求你記念你的憐憫及你的慈愛，因為這是古早以來常常有的。7 求你毋通記念我少年的罪過及我的過失；耶和華啊，求你照你的慈愛，因為你的恩惠記念我，8 耶和華是好閣正直，所以伊欲指示罪人行正路。9 伊欲用公平引導謙遜的人，伊欲用伊的道路教示謙遜的人。10 見若守伊的約及伊的干證的人，耶和華款待in攏是用慈愛誠實。

共同經課 - 3

帖撒羅尼迦前書三章九節~十三節

9 阮佇咱的上帝的面前，為著恁真歡喜，阮為著此個一切的歡喜，會用甚麼的感謝為著恁報答上帝啊？10 阮暝日切切祈禱，愛見著恁的面，來補滿恁的信所無夠。11 願咱的父上帝，及咱的主耶穌引導阮平坦的路就近恁。12 也願主互恁相疼，續疼眾人益發充滿，親像阮的疼恁；13 致到堅固恁的心成聖，無通嫌，佇咱的父上帝的面前，佇咱的主耶穌及伊攏總的聖徒閣來的時。

共同經課 - 4

路加福音二十一章二十五節~三十六節

25 佇日、月、星辰啲欲有兆頭，佇地上列邦困苦；為著海及湧的嘩嘩哮，就紛亂。26 人對驚惶以及聽候所欲到佇天下的事，就昏去，因為天象欲振動。27 佇彼時，欲看見人子用權能，及大榮光坐雲來。28 抵抵有諸個事，恁著挺身起來抬頭，因為恁的贖回近啦。」29 閣用譬喻給in講：「試看無花果及攏總的樹；30 in發芽的時，恁看見，就家已知夏天近啦。31 按呢，恁看見諸個事，就著知上帝的國近啦。32 我實在給恁講，此世代猶未過去，諸個代誌攏欲成。33 天及地欲無去，我的話袂無去。」34 「若是恁著家已謹慎，驚了恁的心互貪食、酒醉，及此世間的掛慮拍亂，就彼日親像活罩忽然到佇恁；35 因為彼日欲親像按呢到佇見若倚起全地面的眾人。36 若是恁著逐時警醒，祈禱，互恁會得閃避將來攏總的事，來倚佇人子的面前。」